

# Građani žele okončati ekonomsku krizu i vratiti se na put ka Evropi



Samo po sebi je jasno da organi BiH trebaju implementirati reforme iz Europskog partnerstva i Sporazuma o stabiliziranju i pridruživanju jer će ove reforme poboljšati životne uvjete čak i prije nego se ostvari puno članstvo u EU, kazao je danas visoki predstavnik i posebni predstavnik EU Valentin Inzko.

“Zdrav razum nalaže da se organi vlasti trebaju usredotočiti na postizanje koncenzusa koji može omogućiti da se ove pozitivne stvari dogode”, kazao je on, pozvavši građanske skupine da govore “jasno i snažno”, a građane i organe da “vode dijalog”.

Visoki predstavnik i posebni predstavnik EU obratio se danas u Sarajevu na sjednici inicijative Građani za Evropu, koja okuplja eksperte iz organizacija civilnoga društva i organe vlasti iz cijele Bosne i Hercegovine u cilju razmatranja zakonodavnih prijedloga i drugih ključnih prioriteta koji će ubrzati proces integracije BiH u EU. Današnji sastanak je bio posvećen sektoru poljoprivrede i ruralnog razvoja.

Iako pola stanovništva BiH radi u ruralnim područjima, na poljoprivredno-prehrambeni sektor otpada samo deset posto BDP-a, a Bosna i Hercegovina je neto uvoznik hrane, kazao je visoki predstavnik i posebni predstavnik EU. To znači da postoji “ogroman potencijal” da se poboljša produktivnost i stvore nova i bolje plaćena radna mjesta.

On je kazao da se to može postignuti "uspostavljanjem moderne i učinkovite institucionalne potpore poljoprivredi i ruralnom razvoju, pružanjem potpore investiranju unutar zemlje i učinkovitim strategijama za marketing i izvoz i pripremanjem ovog sektora da apsorbira tehničku i finansijsku pomoć EU, koja će rasti eksponencijalno kada Bosna i Hercegovina bude osigurala status kandidata za članstvo u EU".

On je rekao da je sada "prevashodni prioritet" da se oformi Vijeće ministara. "Kada budu formirani organi vlasti bit će moguće rješavati ekonomsku krizu, koja traje isuviše dugo i koja je nanijela neizrecivu štetu bosanskohercegovačkim domaćinstvima".

Visoki predstavnik i posebni predstavnik EU je kazao da je inicijativa Građani za Europu omogućila da civilno društvo organima vlasti prezentira konkretne i ostvarive prijedloge. "Ovaj građanski glas je glas koji novi organi vlasti moraju poštivati", kazao je on. "On poziva na praktične reforme koje mogu izvesti Bosnu i Hercegovinu iz ekonomske krize i vratiti je na put ka Evropi".

*Puni tekst govora visokog predstavnika i posebnog predstavnike EU dostupan je na adresama [www.ohr.int](http://www.ohr.int) i [www.eusrbih.eu](http://www.eusrbih.eu)*